

16.04.2025
1850 बजे
आकाशवाणी जयपुर-अजमेर
प्रादेशिक समाचार

- पुलिस स्थापना दिवस रे मौके आज प्रदेश मांय केई कार्यक्रम राख्खी ज्या-मुख्यमंत्री भजनलाल शर्मा पुलिस वाळां ने रोड़वेज री सेमी-डीलक्स बसां मांय मुफ्त सफ़र समेत केई सुबीतां रो ऐलाण कीनो।
- राज्यपाल हरिभाऊ बागडे कह्यो-नुवी राष्ट्रीय शिक्षा नीति विद्यार्थियां रा पूरा विकास अर दिमागी ताकत बधावण मांय मददगार।
- राज्य सरकार वैदिक संस्कार अर शिक्षा बोर्ड बणावण री मंजूरी दीनी।
- प्रदेश मांय तेज गर्मी रो दौर जारी।

000

प्रदेश री पुलिस ने और बेहतर बणावण अर इण ऊं जुड़्या बुनियादी ढांचा सारू 200 करोड़ रुपया रो पुलिस मॉडर्नाइजेशन एंड इंफ्रास्ट्रक्चर फंड बणायो जावेला। आज राजस्थान पुलिस रा 76वां स्थापना दिवस रे मौके राख्खी ज्या जळसा मांय मुख्यमंत्री भजनलाल शर्मा ओ ऐलाण कीनो। वे कह्यो के पुलिस रा जवानां ने रोड़वेज री सेमी डीलक्स बसां मांय ई मुफ्त सफ़र रो सुबीतो दियो जावेला। कार्यक्रम मांय मुख्यमंत्री पुलिस वाळां सारू न्यारा-न्यारा भत्तां मांय बधोतरी रो ऐलाण करता थकां पुलिस रा बेहतरीन सेवा देवण वाळा अहलकारा अर कर्मचारियां ने मुख्यमंत्री सराहनीय सेवा पदक अर पुलिस पदक दे र नवाजा। ई मौके श्री शर्मा कह्यो के पुलिस रा जवानां री हिम्मत, सेवा भावना अर बलिदान री तुलना नी करी जा सके है। वे कह्यो के पुलिस री वर्दी महज कपड़ो नी है बल्कि जिम्मेदारी, वचन अर जिन्दगी रो मतलब है। मुख्यमंत्री कह्यो के पुलिस वाळा समाज रा असली नायक है।

पूरा प्रदेश मांय राजस्थान पुलिस स्थापना दिवस समारोह रा दूजा दिन आज ई केई कार्यक्रम राख्खी ज्या। पुलिस लाइनां मांय संवारे री पोर परेड निकाळी ज्यी अर खून दान करण अर पौधा रोपण रा कार्यक्रम राख्खी ज्या। केई ठौड़ां पुलिस बैंड देशभक्ति रा गीतां रा कार्यक्रम पेश कीना। अपराधियां मांय डर अर आमजन मांय विश्वास रा लक्ष्य सागे राजस्थान पुलिस लारला 75 साल ऊं पूरी सावचेती सागे काम कर रही है। लारला साढे सात दशकां मांय केई चुनौतियां रो सामो करता थकां प्रदेश री पुलिस देश रा बेहतरीन पुलिस बल रा तौर ऊं पहचान बणा चुकी है।

000

मुख्यमंत्री भजनलाल शर्मा कह्यो है के संशोधित ईआरसीपी, राम जल सेतु लिंक परियोजना ने मिशन मोड मांय काम कर र आवता दो साल मांय पूरी करी जावेला। वे आज जयपुर मांय वां रा रेहवास माथे जल संसाधन, इंदिरा गांधी नहर विभाग अर जल उपयोगिता विभाग रा अहलकारां सागे राख्खी ज्यी समीक्षा बैठक मांय बोल रह्या हा।

श्री शर्मा अहलकारां ने ई परियोजना रा तैत कराया जा रह्या कामां माथे लगातार निगराणी राखण अर हर पन्द्रह दिन मांय इण री रपट मुख्यमंत्री रा दफ़तर ने देवण रा हुकम दीना। मुख्यमंत्री कह्यो के ई परियोजना रे जरिए प्रदेश रा 17 जिलां मांय पीवण अर पाणत सागे कारखानां ने ई जरूरत रे मुताबिक पाणी मुहैया करावणो तैय करी ज्यो है। मुख्यमंत्री संशोधित पीकेसी ईआरसीपी परियोजना रा न्यारा-न्यारा पैकेजां रा विवरण अर प्रगति री समीक्षा करता थकां भूमि अवाप्ति रा अवार्ड अर क्लीयरेंस रा

काम मांय तेजी लावण बाबत कह्यो। ई बीचे यमुना नदी रा पाणी ऊं जुड़्या करार री विगतवार प्रोजेक्ट रिपोर्ट तैयार करण सारू बणायी ज्यी भेळी टास्क फोर्स री दूजी मीटिंग 20 अप्रैल ने झुन्झुनू जिला रा पिलानी मांय व्हेला।

000

राज्यपाल हरिभाऊ बागडे कह्यो है के नुवी राष्ट्रीय शिक्षा नीति, विद्यार्थियां रा पूरा विकास अर दिमागी बूतो बधावण ऊं जुड़ी है। वे कह्यो के भणाई-लिखाई रे जरिये विद्यार्थियां ने चुनौतियां रो सामो करण वाळो मन बणावणो चाहिजे। श्री बागडे आज राष्ट्रीय शिक्षा नीति रा बारा मांय पीएम उषा अभियान रा तैत जयपुर मांय राख्यी ज्यी राज्य स्तर री कार्यशाला मांय बोल रह्या हा। कॉलेज शिक्षा आयुक्तालय, सेवा भारती अर राष्ट्रीय सेवा योजना री ओर ऊं राख्यी ज्यी ई कार्यशाला मांय राज्यपाल कह्यो के केंद्र सरकार न्यारी-न्यारी योजनावां रा तैत विद्यार्थियां रा विकास सारू बजट दीनो है। कार्यक्रम मांय उपमुख्यमंत्री डॉ. प्रेमचंद बैरवा आपदा प्रबंधन ऊं जुड़ी भारत री ज्ञान परंपरा रो जिक करता थकां न्यारा-न्यारा ग्रंथां मांय कुदरती आपदावां ऊं बचाव रा तरीकां री सराहवणा कीनी।

000

सवाईमाधोपुर जिला रा रणथंभौर राष्ट्रीय उद्यान मांय त्रिनैत्र गणेश मन्दिर रा गेला रा अमराई वन हलका मांय आज एक बाघ एक बच्चा ने उठा र ले ग्यो। जाणकारी मिलता ई जंगलात महकमा रा अहलकार अर कर्मचारी मौके पूग र बच्चा ने बाघ रा कब्जा ऊं छुड़ा र अस्पताल पूगायो, जठे डॉक्टर बच्चा री मौत री जाणकारी दीनी। ध्यानजोग है के घटना री ठौड़ रे आरे-सारे बाघिन अर वां रा 3 बच्चां री हलचल रेहवे है। बच्चा माथे हमलो करण वाळा बाघ री हाल तांई पिछाण नी करी जा सकी है।

000

प्रदेश मांय वैदिक संस्कार अर शिक्षा बोर्ड बणायी ज्यो है। राज्य सरकार इण ने आज मंजूरी दे दीनी। संस्कृत शिक्षा विभाग रा संयुक्त शासन सचिव कैलाश चंद यादव ई बारा मांय हुकम जारी कर दीना है। प्रोफेसर गणेशी लाल सुथार री सदरत वाळा ई बोर्ड मांय प्रोफेसर राजेंद्र प्रसाद मिश्रा, डॉ कैलाश चतुर्वेदी, प्रोफेसर नरपत सिंह राठौर, नरेश चंद शर्मा, भवानी शंकर शर्मा अर प्रोफेसर हरेश्वर छीपा ने शामिल करी ज्या है। ओ बोर्ड राज्य सरकार कानी ऊं संभाग लेवल माथे नुवा खोल्या जा रह्या आदर्श वेद विद्यालय अर तीन वैदिक गुरुकुल समेत राज्य मांय सगळा वेद विद्यालयां अर वेद पाठशालावां ने चलावेला। ओ बोर्ड आं रूकूलां रा कोर्स अर परीक्षा ऊं जुड़्या कामकाज ई देखेला।

000

नेशनल हेराल्ड मामला ऊं जुड़्या धन शोधन मामला मांय प्रवर्तन निदेशालय-ईडी री कार्रवाई रे खिलाफ कांग्रेस रा कार्यकर्ता आज ई.डी. रा दफतरां सामी धरना-प्रदर्शन कीना। जयपुर मांय ई.डी. रा दफतर सामी करी ज्या विरोध प्रदर्शन मांय राज्य रा पैली वाळा मुख्यमंत्री अशोक गहलोत, पार्टी रा प्रदेश अध्यक्ष गोविंद सिंह डोटसरा अर विधानसभा मांय विपक्ष रा नेता टीकाराम जूली समेत मोटी तादाद मांय कांग्रेस रा नेता अर पार्टी रा ओहदादार सिरकत कीनी। खबरनवीसां सागे बातचीत करता थकां श्री जूली भारतीय जनता पार्टी माथे बदला री मंशा ऊं काम करण रो आरोप माण्ड्यो।

दूजी कानी भारतीय जनता पार्टी कांग्रेस पार्टी माथे देश री सम्पत्ति ने गैर कानूनी तरीका ऊं इस्तेमाल करण रो आरोप माण्ड्यो। पार्टी रा प्रदेश अध्यक्ष मदन राठौड़ गांधी परिवार माथे हजारों करोड़ रुपया री संपत्ति खुर्द-बुर्द कर देवण रो आरोप माण्ड्यो। राठौड़ कह्यो के प्रवर्तन निदेशालय ई बारा मांय आरोपितां ऊं पूछताछ कीनी, पण

कोई ई संतोषजनक जवाब नी दीनो। श्री राठौड़ साफ कीनो के कानून वां रो काम कर रह्यो है अर किण ई ने वां रा काम मांय दखलअंदाजी करण रो हक नी है।

000

जयपुर मांय आज भारतीय जनता पार्टी रा प्रदेश कार्यालय मांय वक्फ सुधार जन जागरण अभियान रा बारा मांय कार्यशाला राखी ज्यी। पार्टी रा प्रदेश प्रभारी अर राष्ट्रीय महामंत्री डॉ. राधामोहन दास अग्रवाल कार्यशाला रो उद्घाटन कीनो। ई मौके डॉ. अग्रवाल कह्यो के वक्फ (संशोधन) बिल ऊं वक्फ संपत्तियां ऊं जुड़्या मामलां मांय साफगोई अर जवाबदेही तैय व्हेला अर भ्रष्टाचार माथे काबू कर्यो जा सकेला। कार्यशाला मांय मुख्यमंत्री भजनलाल शर्मा, उपमुख्यमंत्री डॉ. प्रेमचंद बैरवा, भाजपा रा प्रदेश अध्यक्ष मदन राठौड़ अर राष्ट्रीय सचिव अल्का गुर्जर समेत पार्टी रा केई ओहदादार अर कार्यकर्ता ई सिरकत कीनी।

000

प्रदेश मांय आखातीज अर पीपल पूण्यू रे मौके बाळक जोड़ां रा ब्याह री शंका ने ध्यान राखता थकां प्रशासन सावचेती बधा दीनी है। राज्य रा आतूणी हलका अर दूर-दराज रा गांवांई हलकां मांय सतर्कता दल बणा र लोगां ने बाळपणा मांय ब्याह रा गलत नतीजां री जाणकारी दी जा रही है। म्हाणी डीग खबरनवीस बतायो के जिला मांय ई सारू महिला अर बाल विकास विभाग री कार्यकर्ता अर खुद सेवक समूहां री महिलावां री ई मदद ली जा रही है।

000

प्रदेश मांय लारला 24 घंटां मांय घणखर ठौड़ां दिन री बगत पारो चढ्यो। राज्य रा लंकाऊ-आतूणी हलकां मांय कठे-कठे घणो उन्नो बायरो बाजण ऊं जिन्दगी माथे असर पड़्यो। मौसम विभाग आज बाड़मेर अर जैसलमेर जिलां मांय हीटवेव रो रेड अलर्ट जारी कीनो, जद के 11 जिलां सारू ऑरेंज अर यलो अलर्ट जारी करी ज्यो हो। महकमा रे मुजब आवता 4-5 दिन मौसम सूखो रेहवण रा आसार है। ई बीच आज उदयपुर, डूंगरपुर अर लंकाऊ हलकां मांय कठे-कठे हल्की बारिश री संभावना है।

000